

# 佛教正覺同修會 大悲懺法會疏文

離苦得解脫，大悲觀世音，得大自在力，無畏施眾生。  
妙音觀世音，梵音海潮音，救世悉安寧，出世獲常住。

一心歸命，南無大悲慈父廣大靈感觀世音菩薩！仰惟大士從聞思修入三摩地，得二隨順、四不思議、十四無畏、十九說法、七難二求、三十二應無量功德。興大威力，發大誓願，同流九界，六道四生，生死趣中，興百千萬億無量恒河沙劫數善行方便，救度拔濟一切眾生，無有休息。我今哀求，必賜加被；所有意文佛前恭宣，

## 大圓鏡中俯垂朗鑑。

伏念弟子

無始劫以來不識自心如來，以虛妄我為真實我，

顛倒分別，起念造惡，苦果不息。弟子雖以夙時微善，獲遇真乘、得聞正法，仰奉大士教誨「大慈悲心是，平等心是，無為心是，無染著心是，空觀心是，恭敬心是，卑下心是，無雜亂心是，無見取心是，無上菩提心是」，以真實理為弟子開解進趣；弟子雖復於平日行中，憶佛念佛，勤加用功、廣修福慧，未敢稍怠，無奈習染偏強，心常執著五陰假我，三毒流火時刻現行，嘆己德薄，淨功莫剋。又慮弟子過去無始劫來，與諸怨親，以同入三界生死苦海之故，恩怨報償、業業相牽，長劫輪轉、無有出期。

今弟子仰仗大悲神咒佛法勝會、承大士力，至心發露懺悔過去現在諸惡，已作之罪不敢覆藏，未作之業皆不令造，如是清淨身三業、口四過、意三毒，遠離惡見邪行，化解自他怨讎，一體出纏。以真實心如來藏妙法，勤淨自心，永離能所之執見，斷除五陰之妄想。

惟願大士，天耳聞聲，悲心救苦，憐愍加被。開我迷雲，通曉義理；參禪學道，悟無生忍，世世生生，行菩薩道；得大辯才、大智慧、大壽命、大安樂。一切會眾，無諸魔障；僧團和敬，師道常彰；正覺寺造立順遂，開弘聖教；法界眾生，同圓種智。

稽首十方諸佛、觀音大士、諸聖尊前，弟子一心五體投地，

伏願 大士證盟攝受。

佛曆二五六七年 公元二〇二三年 歲次癸卯 農曆 月 日

佛教正覺同修會共修弟子

及 氏昭穆宗親等

於臺北正覺講堂 拜伏具呈